

**Parlimen: Orang Ramai Terus Disaran Guna Pengangkutan Awam, Kurangkan Kesyakan Lalu Lintas**  
**Bernama**  
**18 Oktober , 2011**

KUALA LUMPUR, 18 Okt (Bernama) -- Orang ramai terus disaran mengurangkan kebergantungan pada kenderaan persendirian, sebaliknya menggunakan sistem pengangkutan awam bagi mengurangkan kesesakan di ibu negara.

Menyaran demikian Menteri Wilayah Persekutuan dan Kesejahteraan Bandar Datuk Raja Nong Chik Raja Zainal Abidin berkata kadar pemilikan kereta di kalangan pengguna kenderaan kini terus meningkat dari lapan hingga 12 peratus setiap tahun sepanjang tempoh lima tahun lepas.

"Selain itu, faktor kadar kenderaan dinaiki seorang individu juga terlalu tinggi jika dibandingkan dengan pengguna (individu) yang menggunakan pengangkutan awam iaitu nisbahnya 85:15," katanya ketika menjawab soalan Dr. Tan Seng Giaw (DAP-Kepong) di persidangan Dewan Rakyat, Selasa.

Dr Tan bertanyakan mengenai pelaksanaan kerajaan dalam memperbaiki sistem pengangkutan dan kesesakan lalu lintas di ibu negara.

Raja Nong Chik berkata halangan-halangan lalu lintas kesan dari sikap pemandu yang tidak mematuhi peraturan lalu lintas dan kejadian-kejadian seperti kemalangan serta projek-projek pembangunan juga merupakan salah satu punca berlakunya kesesakan lalu lintas.

Dalam pada itu, beliau berkata sistem pengangkutan di bandaraya ini kini memuaskan dengan rangkaian jalan raya yang lengkap, kadar kebolehsampaian yang tinggi dan sistem pengangkutan awam yang semakin meningkat.

Namun demikian, katanya, kerajaan sentiasa prihatin untuk meningkatkan sistem pengangkutan dari semasa ke semasa dengan beberapa projek dilaksanakan bagi mencapai usaha tersebut.

"Antara program itu ialah menaiktaraf jalan-jalan utama, membina persimpangan bertingkat, menghubungkan jalan yang tidak bersambung dan mempertingkatkan pengurusan trafik.

"Kita juga berhasrat untuk menaiktaraf kemudahan-kemudahan pengangkutan awam serta melengkapkan rangkaian jalan raya khususnya untuk jalan lingkar dan serta jalan-jalan jajaran ke luar bandar," katanya.

Beliau berkata penguatkuasaan lalu lintas oleh pihak berkuasa perlu diperketatkan memandangkan sikap pemandu yang tidak mematuhi peraturan lalu lintas selain dapat mengelakkan kes kemalangan maut di negara ini.

"Kita turut mengadakan usahasama bersepadu dengan Polis DiRaja Malaysia (PDRM), Jabatan Pengangkutan Jalan (JPJ) dan Suruhanjaya Pengangkutan Awam Darat (SPAD) bagi menjalankan tindakan penguatkuasaan yang lebih ketat," katanya.

---BERNAMA

Hakcipta © 2011 BERNAMA

Source: <http://www.bernama.com/bernama/v5/bm/newsindex.php?id=620757>